

Āmūs

Isrāīl ke Paṛosiyoñ kī Adālat

¹ Zail meñ Āmūs ke paighāmāt qalamband haiñ. Āmūs Taqua Shahr kā gallābān thā. Zalzale se do sāl pahle us ne Isrāīl ke bāre meñ royā meñ yih kuchh dekhā. Us waqt Uzziyāh Yahūdāh kā aur Yarubiyām bin Yuās Isrāīl kā bādshāh thā.

² Āmūs bolā, “Rab Koh-e-Siyyūn par se dahārtā hai, us kī garajtī āwāz Yarūshalam se sunāi detī hai. Tab gallābānoñ kī charāgāheñ sūkh jāti haiñ aur Karmil kī choṭī par jangal murjhā jātā hai.”

³ Rab farmātā hai, “Damishq ke bāshindoñ ne bār bār gunāh kiyā hai, is lie maiñ unheñ sazā die baḡhair nahīñ chhoṛūngā. Kyoñki unhoñ ne Jiliyād ko gāhne ke āhnī auzār se ḡhūb kūṭ kar gāh liyā hai.

⁴ Chunāñche maiñ Hazāel ke gharāne par āg nāzil karūnga, aur Bin-hadad ke mahal nazar-e-ātish ho jāeñge.

⁵ Maiñ Damishq ke kunde ko toṛ kar Biq'at-āwan aur Bait-adan ke hukmrānoñ ko maut ke ghāṭ utārūnga. Arām kī qaum jilāwatan ho kar Qīr meñ jā basegī.” Yih Rab kā farmān hai.

⁶ Rab farmātā hai, “Ḡhazzā ke bāshindoñ ne bār bār gunāh kiyā hai, is lie maiñ unheñ sazā die baḡhair nahīñ chhoṛūngā. Kyoñki unhoñ ne pūrī ābādiyoñ ko jilāwatan karke Adom ke hawāle kar diyā hai.

7 Chunānche main Ġhazzā kī fasīl par āg nāzil karūnga, aur us ke mahal nazar-e-ātish ho jāenge.

8 Ashdūd aur Askqalūn ke hukmrānoñ ko main mār dālūngā, Aqrūn par bhī hamlā karūnga. Tab bache-khuche Filistī bhī halāk ho jāenge.” Yih Rab Qādir-e-mutlaq kā farmān hai.

9 Rab farmātā hai, “Sūr ke bāshindoñ ne bār bār gunāh kiyā hai, is lie main unheñ sazā die baḡhair nahīn chhoṛūngā. Kyoñki unhoñ ne barādarānā ahd kā lihāz na kiyā balki pūrī ābādiyoñ ko jilāwatan karke Adom ke hawāle kar diyā.

10 Chunānche main Sūr kī fasīl par āg nāzil karūnga, aur us ke mahal nazar-e-ātish ho jāenge.”

11 Rab farmātā hai, “Adom ke bāshindoñ ne bār bār gunāh kiyā hai, is lie main unheñ sazā die baḡhair nahīn chhoṛūngā. Kyoñki unhoñ ne apne Isrāīlī bhāiyoñ ko talwār se mār mār kar un kā tāqqub kiyā aur saḡhtī se un par rahm karne se inkār kiyā. Un kā qahr bharaktā rahā, un kā taish kabhī ṭhandā na huā.

12 Chunānche main Temān par āg nāzil karūnga, aur Busrā ke mahal nazar-e-ātish ho jāenge.”

13 Rab farmātā hai, “Ammon ke bāshindoñ ne bār bār gunāh kiyā hai, is lie main unheñ sazā die baḡhair nahīn chhoṛūngā. Kyoñki apnī sarhaddoñ ko barhāne ke lie unhoñ ne Jiliyād kī hāmīlā auratoñ ke peṭ chīr dāle.

14 Chunānche main Rabbā kī fasīl ko āg lagā dūngā, aur us ke mahal nazar-e-ātish ho jāenge.

Jang ke us din har taraf faujiyoñ ke nāre buland ho jāeñge, tūfān ke us din un par saḡht āndhī tūṭ paṛegī.

¹⁵ Un kā bādshāh * apne afsaroñ samet qaidī ban kar jilāwatan ho jāegā.” Yih Rab kā farmān hai.

2

¹ Rab farmātā hai, “Moāb ke bāshindoñ ne bār bār gunāh kiyā hai, is lie maiñ unheñ sazā die baḡhair nahīn chhoṛūngā. Kyoñki unhoñ ne Adom ke bādshāh kī haḍḍiyoñ ko jalā kar rākh kar diyā hai.

² Chunāñche maiñ Mulk-e-Moāb par āg nāzil karūñga, aur Qariyot ke mahal nazar-e-ātish ho jāeñge. Jang kā shor-sharābā machegā, faujiyoñ ke nāre buland ho jāeñge, narsingā phūñkā jāegā. Tab Moāb halāk ho jāegā.

³ Maiñ us ke hukmrān ko us ke tamām afsaroñ samet halāk kar dūngā.” Yih Rab kā farmān hai.

Yahūdāh kī Adālat

⁴ Rab farmātā hai, “Yahūdāh ke bāshindoñ ne bār bār gunāh kiyā hai, is lie maiñ unheñ sazā die baḡhair nahīn chhoṛūngā. Kyoñki unhoñ ne Rab kī shariyat ko radd karke us ke ahkām par amal nahīn kiyā. Un ke jhūṭe dewatā unheñ ḡhalat rāh par le gae haiñ, wuh dewatā jin kī pairawī un ke bāpdādā bhī karte rahe.

⁵ Chunāñche maiñ Yahūdāh par āg nāzil karūñga, aur Yarūshalam ke mahal nazar-e-ātish ho jāeñge.”

* **1:15** yā Malik Dewatā

Isrāīl kī Adālat

⁶ Rab farmātā hai, “Isrāīl ke bāshindoñ ne bār bār gunāh kiyā hai, is lie main unheñ sazā die baḡhair nahīñ chhoṛūngā. Kyoñki wuh sharīf logoñ ko paise ke lie bechte aur zarūratmandoñ ko faroḳht karte haiñ tāki ek joṛī jūtā mil jāe.

⁷ Wuh ḡharīboñ ke sar ko zamīn par kuchal dete, musībatzadoñ ko insāf milne se rokthe haiñ. Bāp aur beṭā donoñ ek hī kasbī ke pās jā kar mere nām kī behurmatī karte haiñ.

⁸ Jab kabhī kisī qurbāngāh ke pās pūjā karne jāte haiñ to aise kaproñ par ārām karte haiñ jo qarzdāroñ ne zamānat ke taur par die the. Jab kabhī apne dewatā ke mandir meñ jāte to aise pairoñ se mai kharīd kar pite haiñ jo jurmānā ke taur par zarūratmandoñ se mil gae the.

⁹ Yih kaisī bāt hai? Main hī ne Amoriyoñ ko un ke āge āge nest kar diyā thā, hālāñki wuh deodār ke daroḳhtoñ jaise lambe aur balūt ke daroḳhtoñ jaise tāqatwar the. Main hī ne Amoriyoñ ko jaṛoñ aur phal samet miṭā diyā thā.

¹⁰ Is se pahle main hī tumheñ Misr se nikāl lāyā, main hī ne chālīs sāl tak registān meñ tumhārī rāhnumāī karte karte tumheñ Amoriyoñ ke mulk tak pahuñchāyā tāki us par qabzā karo.

¹¹ Main hī ne tumhāre beṭoñ meñ se nabī barpā kie, aur main hī ne tumhāre naujawānoñ meñ se kuchh chun lie tāki apnī kḡhidmat ke lie maḳhsūs karūñ.” Rab farmātā hai, “Ai Isrāīliyo, kyā aisā nahīñ thā?

¹² Lekin tum ne mere lie maḳhsūs ādmियोñ ko mai pilāī aur nabियोñ ko hukm diyā ki

nabuwwat mat karo.

¹³ Ab main̄ hone dūngā ki tum anāj se ḵhūb ladī huī bailgārī kī tarah jhūlne lagoge.

¹⁴ Na tezrau shaḵhs bhāg kar bachegā, na tāqatwar ādmī kuchh kar pāegā. Na sūrmā apnī jān bachāegā,

¹⁵ na tīr chalāne wālā qāym rahegā. Koī nahīn bachegā, ḵhāh paidal dauṛne wālā ho yā ghoṛe par sawār.

¹⁶ Us dīn sab se bahādur sūrmā bhī hathiyār ḍāl kar nangī hālat meṅ bhāg jāegā.” Yih Rab kā farmān hai.

3

¹ Ai Isrāīliyo, wuh kalām suno jo Rab tumhāre ḵhilāf farmātā hai, us pūrī qaum ke ḵhilāf jise main̄ Misr se nikāl lāyā thā.

² “Duniyā kī tamām qaumoṅ meṅ se main̄ ne sirf tumhīn ko jān liyā, is lie main̄ tumhīn ko tumhāre tamām gunāhoṅ kī sazā dūngā.”

Nabī kī Zimmedārī

³ Kyā do afrād mil kar safr kar sakte haiṅ agar wuh muttafiḳ na hoṅ?

⁴ Kyā sherbabar dahāṛtā hai agar use shikār na milā ho? Kyā jawān sher apnī mānd meṅ garajtā hai agar us ne kuchh pakaṛā na ho?

⁵ Kyā parindā phande meṅ phaṅs jātā hai agar phande ko lagāyā na gayā ho? Yā phandā kuchh phaṅsā saktā hai agar shikār na ho?

⁶ Jab shahr meṅ narsingā phūṅkā jātā hai tāki logoṅ ko kisī ḵhatre se āgāh kare to kyā wuh nahīn ghabrāte? Jab āfat shahr par ātī hai to kyā Rab kī taraf se nahīn hotī?

⁷ Yaqīnan jo bhī mansūbā Rab Qādir-e-mutlaq bāndhe us par amal karne se pahle wuh use apne khādimoñ yānī nabiyonñ par zāhir kartā hai.

⁸ Sherbabar dahār uṭhā hai to kaun hai jo ḍar na jāe? Rab Qādir-e-mutlaq bol uṭhā hai to kaun hai jo nabuwat na kare?

Sāmariya ko Rihāi Nahīn Milegī

⁹ Ashdūd aur Misr ke mahalonñ ko ittalā do, “Sāmariya ke pahāronñ par jamā ho kar us par nazar ḍālo jo kuchh shahr meñ ho rahā hai. Kitnī baṛī halchal mach gaī hai, kitnā zulm ho rahā hai.”

¹⁰ Rab farmātā hai, “Yih log sahīh kām karnā jānte hī nahīn balki zālim aur tabāhkun tarīqonñ se apne mahalonñ meñ khazāne jamā karte haiñ.”

¹¹ Chunānche Rab Qādir-e-mutlaq farmātā hai, “Dushman mulk ko gher kar terī qilābandiyonñ ko ḍhā degā aur tere mahalonñ ko lūṭ legā.”

¹² Rab farmātā hai, “Agar charwāhā apnī bheṛ ko sherbabar ke muñh se nikālne kī koshish kare to shāyad do pinḍliyañ yā kān kā ṭukṛā bach jāe. Sāmariya ke Isrāīlī bhī isī tarah hī bach jāenge, khāh wuh is waqt apne shāndār sofonñ aur khūsūrat gaddiyonñ par āram kyonñ na karenñ.”

¹³ Rab Qādir-e-mutlaq jo āsmānī lashkaronñ kā Khudā hai farmātā hai, “Suno, Yaqūb ke gharāne ke khilāf gawāhī do!

¹⁴ Jis din mainñ Isrāīl ko us ke gunāhoñ kī sazā dūngā us din mainñ Baitel kī qurbāngāhoñ ko

mismār karūṅga. Tab qurbāṅgāh ke konoṅ par lage sīṅg ṭuṭ kar zamīn par gir jāeṅge.

¹⁵ Maiṅ sardiyoṅ aur garmiyōṅ ke mausam ke lie tāmīr kie gae gharoṅ ko ḍhā dūṅgā. Hāthidānt se ārāstā imāraten khāk meṅ milāi jāeṅgī, aur jahān is waqt muta'addid makān nazar āte haiṅ wahān kuchh nahīn rahegā.” Yih Rab kā farmān hai.

4

Sāmariya kī Zālim Aurateṅ

¹ Ai Koh-e-Sāmariya kī moṭī-tāzī gāyo, * suno merī bāt! Tum ḡharīboṅ par zulm kartī aur zarūratmandoṅ ko kuchal detī, tum apne shauharoṅ ko kahtī ho, “Jā kar mai le āo, ham aur pīnā chāhtī haiṅ.”

² Rab ne apnī quddūsiyat kī qasam khā kar farmāyā hai, “Wuh din āne wālā hai jab dushman tumheṅ kāṅṭoṅ ke zariye ghasīṭ kar apne sāth le jāegā. Jo bachegā use machhlī ke kāṅṭe se pakaṛā jāegā.

³ Har ek ko fasīl ke rakhnoṅ meṅ se sīdhā nikalnā paṛegā, har ek ko Harmūn Pahār kī taraf bhagā diyā jāegā.” Yih Rab kā farmān hai.

Isrāīl ko Samjhāyā Nahīn Jā Saktā

⁴ “Chalo, Baitel jā kar gunāh karo, Jiljāl jā kar apne gunāhoṅ meṅ izāfā karo! Subah ke waqt apnī qurbāniyoṅ ko chaṛhāo, tīsre din āmdanī kā daswān hissā pesh karo.

* **4:1** Lafzī tarjumā: ‘Basan kī gāyo.’ Basan ek pahārī ilāqā thā jis ke maweshī mashhūr the.

⁵ Khamīrī roṭī jalā kar apnī shukrguzārī kā izhār karo, buland āwāz se un qurbāniyoṅ kā elān karo jo tum apnī khushī se adā kar rahe ho. Kyoṅki aisī harkateṅ tum Isrāīliyoṅ ko bahut pasand haiṅ.” Yih Rab Qādir-e-mutlaq kā farmān hai.

⁶ Rab farmātā hai, “Maiṅ ne kāl paṛne diyā. Har shahr aur ābādī meṅ roṭī khatm huī. To bhī tum mere pās wāpas nahīn āe!”

⁷ Abhī fasal ke pakne tak tīn māh bāqī the ki maiṅ ne tumhāre mulk meṅ bārishoṅ ko rok diyā. Maiṅ ne hone diyā ki ek shahr meṅ bārish huī jabki sāth wālā shahr us se mahrūm rahā, ek khet bārish se serāb huā jabki dūsrā jhulas gayā.

⁸ Jis shahr meṅ thoṛā-bahut pānī bāqī thā wahān dīgar kāi shahroṅ ke bāshinde larḥkarāte hue pahuṅche, lekin un ke lie kāfī nahīn thā. To bhī tum mere pās wāpas na āe!” Yih Rab kā farmān hai.

⁹ Rab farmātā hai, “Maiṅ ne tumhārī fasloṅ ko patrog aur phaphūndī se tabāh kar diyā. Jo bhī tumhāre muta'addid angūr, anjīr, zaitūn aur bāqī phal ke bāghoṅ meṅ ugtā thā use ṭīḍḍiyān khā gaīn. To bhī tum mere pās wāpas na āe!”

¹⁰ Rab farmātā hai, “Maiṅ ne tumhāre darmiyān aisī mohlak bīmārī phailā dī jaisī qadīm zamāne meṅ Misr meṅ phail gaī thī. Tumhāre naujawānoṅ ko maiṅ ne talwār se mār dālā, tumhāre ghoṛe tum se chhīn lie gae. Tumhārī lashkargāhoṅ meṅ lāshoṅ kā tāffun itnā phail gayā ki tum bahut tang hue. To bhī tum mere pās wāpas na āe.”

11 Rab farmātā hai, “Maiñ ne tumhāre darmiyān aisī tabāhī machāī jaisī us din huī jab maiñ ne Sadūm aur Amūrā ko tabāh kiyā.

Tumhārī hālat bilkul us lakaṛī kī mānind thī jo āg se nikāl kar bachāī to gaī lekin phir bhī kāfī jhulas gaī thī. To bhī tum wāpas na āe.

12 Chunāñche ai Isrāīl, ab maiñ āindā bhī tere sāth aisā hī karūnga. Aur chūñki maiñ tere sāth aisā karūnga, is lie apne Ḳhudā se milne ke lie taiyār ho jā, ai Isrāīl!”

13 Kyoñki Allāh hī pahāron ko tashkīl detā, hawā ko ḵhalaq kartā aur apne ḵhayālāt ko insān par zāhir kartā hai. Wuhī tarḳā aur andherā paidā kartā aur wuhī zamīn kī bulandiyon par chaltā hai. Us kā nām ‘Rab, Lashkaron kā Ḳhudā’ hai.

5

Mere Pās Lauṭ Āo!

1 Ai Isrāīlī qaum, merī bāt suno, tumhāre bāre meñ mere nohā par dhyān do!

2 “Kuñwārī Isrāīl gir gaī hai aur āindā kabhī nahīn uṭhegī. Use us kī apnī zamīn par paṭaḵh diyā gayā hai, aur koī use dubārā khaṛā nahīn karegā.”

3 Rab Qādir-e-mutlaq farmātā hai, “Isrāīl ke jis shahr se 1,000 mard laṛne ke lie nikleñge us ke sirf 100 afrād wāpas āeñge. Aur jis shahr se 100 nikleñge, us ke sirf 10 mard wāpas āeñge.”

4 Kyoñki Rab Isrāīlī qaum se farmātā hai, “Mujhe talāsh karo to tum jite rahoge.

5 Na Baitel ke tālib ho, na Jiljāl ke pās jāo, aur na Bair-sabā ke lie rawānā ho jāo! Kyoñki Jiljāl

ke bāshinde yaqīnan jilāwatan ho jāenge, aur Baitel nest-o-nābūd ho jāegā.”

⁶ Rab ko talāsh karo to tum jīte rahoge. Warnā wuh āg kī tarah Yūsuf ke gharāne meñ se guzar kar Baitel ko bhasm karegā, aur use koī nahīn bujhā sakegā.

Har Taraf Nāinsāfi

⁷ Un par afsos jo insāf ko ulaṭ kar zahr meñ badal dete, jo rāstī ko zamīn par paṭaḅh dete haiñ!

⁸ Allāh Sāt Saheliyoñ ke Jhumke aur Jauze kā Ḳhāliq hai. Andhere ko wuh subah kī raushnī meñ aur din ko rāt meñ badal detā hai. Jo samundar ke pānī ko bulā kar rū-e-zamīn par unḍel detā hai us kā nām Rab hai!

⁹ Achānak hī wuh zorāwaroñ par āfat lātā hai, aur us ke kahne par qilāband shahr tabāh ho jātā hai.

¹⁰ Tum us se nafrat karte ho jo adālat meñ insāf kare, tumheñ us se ghīn ātī hai jo sach bole.

¹¹ Tum gharīboñ ko kuchal kar un ke anāj par had se zyādā ṭaiks lagāte ho. Is lie go tum ne tarāshe hue pattharoñ se shāndār ghar banāe haiñ to bhī un meñ nahīn rahoge, go tum ne angūr ke phalte-phūlte bāgh lagāe haiñ to bhī un kī mai se mahzūz nahīn hoge.

¹² Maiñ to tumhāre muta'addid jarāym aur sangīn gunāhoñ se ḳhūb wāqif hūñ. Tum rāstbāzoñ par zulm karte aur rishwat le kar gharīboñ ko adālat meñ insāf se mahrūm rakhte ho.

¹³ Is lie samajhdār shaḳhs is waqt ḳhāmosh rahtā hai, waqt itnā hī burā hai.

14 Burāī ko talāsh na karo balki achchhāī ko, tab hī jīte rahoge. Tab hī tumhārā dāwā durust hogā ki Rab jo lashkaron kā Ḳhudā hai hamāre sāth hai.

15 Burāī se nafrat karo aur jo kuchh achchhā hai use pyār karo. Adālaton meñ insāf qāym rakho, shāyad Rab jo lashkaron kā Ḳhudā hai Yūsuf ke bache-khuche hisse par rahm kare.

16 Chunānche Rab jo lashkaron kā Ḳhudā aur hamārā āqā hai farmātā hai, “Tamām chaukon meñ āh-o-bukā hogī, tamām galiyon meñ log ‘Hāy, hāy’ karenge. Khetībārī karne wālon ko bhī bulāyā jāegā tāki peshāwarānā taur par sog manāne wālon ke sāth giryā-o-zārī karen.

17 Angūr ke tamām bāghon meñ wāwailā machegā, kyonki maiñ ḳhud tumhāre darmiyān se guzarūnga.” Yih Rab kā farmān hai.

Rab kā Din Haulnāk Hai

18 Un par afsos jo kahte haiñ, “Kāsh Rab kā din ā jāe!” Tumhāre lie Rab ke din kā kyā fāydā hogā? Wuh to tumhāre lie raushnī kā nahīn balki tārīkī kā bāis hogā.

19 Tab tum us ādmī kī mānind hoge jo sherbabar se bhāg kar rīchh se ṭakrā jātā hai. Jab ghar meñ panāh le kar hāth se dīwār kā sahārā letā hai to sāñp use ḍas letā hai.

20 Hāñ, Rab kā din tumhāre lie raushnī kā nahīn balki tārīkī kā bāis hogā. Aisā andherā hogā ki ummīd kī kiran tak nazar nahīn āegī.

21 Rab farmātā hai, “Mujhe tumhāre mazhabī tahwāron se nafrat hai, maiñ unheñ haqīr jāntā hūñ. Tumhāre ijtimāon se mujhe ghin ātī hai.

22 Jo bhasm hone wālī aur ḡhallā kī qurbāniyān tum mujhe pesh karte ho unheñ main pasand nahīn kartā, jo moṭe-tāze bail tum mujhe salāmatī kī qurbānī ke taur par chaḡhāte ho un par main nazar bhī nahīn ḡālnā chāhtā.

23 Dafā karo apne ḡitoñ kā shor! Main tumhāre sitāroñ kī mausiḡī sunanā nahīn chāhtā.

24 In chīzoñ kī bajāe insāf kā chashmā phūṭ nikle aur rāstī kī kabhī band na hone wālī nahar bah nikle.

25 Ai Isrāīl ke gharāne, jab tum registān meñ ḡhūmte-phirte the to kyā tum ne un 40 sāloñ ke daurān kabhī mujhe zabah aur ḡhallā kī qurbāniyān pesh kīn?

26 Nahīn, us waqt bhī tum apne bādshāh Sakkūt Dewatā aur apne sitāre Kīwān Dewatā ko uṭhāe phirte the, go tum ne apne hāthoñ se yih but apne lie banā lie the.

27 Is lie Rab jis kā nām lashkaroñ kā Ḳhudā hai farmātā hai ki main tumheñ jilāwatan karke Damishḡ ke pār basā dūngā.”

6

Rāhnumāoñ kī Ḳhudetimādī aur Aiyāshī

1 Koh-e-Siyyūn ke beparwā bāshindoñ par afsos! Koh-e-Sāmariya ke bāshindoñ par afsos jo apne āp ko mahfūz samajhte haiñ. Hāñ, sab se ālā qaum ke un shurafā par afsos jin ke pās Isrāīlī qaum madad ke lie ātī hai.

2 Kalnā Shahr ke pās jā kar us par ḡhaur karo, wahāñ se azīm shahr Hamāt ke pās pahuñcho, phir Filistī mulk ke shahr Jāt ke pās utro. Kyā

tum in mamālik se behtar ho? Kyā tumhārā ilāqā in kī nisbat baṛā hai?

³ Tum apne āp ko āfat ke din se dūr samajh kar apnī zālīm hukūmat dūsroñ par jatāte ho.

⁴ Tum hāthidānt se ārāstā palangoñ par sote aur apne shāndār sofoñ par pānw phailāte ho. Khāne ke lie tum apne rewaṛoñ se achche achche bheṛ ke bachche aur moṭe-tāze bachhre chun lete ho.

⁵ Tum apne sitāroñ ko bajā bajā kar Dāūd kī tarah muḵhtalif qism ke gīt taiyār karte ho.

⁶ Mai ko tum baṛe baṛe pyāloñ se pī lete, behtarīn qism ke tel apne jism par milte ho. Afsos, tum parwā hī nahīn karte ki Yūsuf kā gharānā tabāh hone wālā hai.

⁷ Is lie tum un logoñ meñ se hoge jo pahle qaidī ban kar jilāwatan ho jāēnge. Tab tumhārī rangraliyān band ho jāēngī, tumhārī āwārāgard aur kāhil zindagī khatm ho jāegī.

⁸ Rab jo lashkaroñ kā Khudā hai farmātā hai, “Mujhe Yāqūb kā ghurūr dekh kar ghin ātī hai, us ke mahaloñ se main mutanaffir hūn. Main shahr aur jo kuchh us meñ hai dushman ke hawāle kar dūngā. Mere nām kī qasam, yih merā, Rab Qādir-e-mutlaq kā farmān hai.”

⁹ Us waqt agar ek ghar meñ das ādmī rah jāēn to wuh bhī mar jāēnge.

¹⁰ Phir jab koī rishtedār āe tāki lāshoñ ko uṭhā kar dafnāne jāe aur dekhe ki ghar ke kisī kone meñ abhī koī chhup kar bach gayā hai to wuh us se pūchhegā, “Kyā āp ke alāwā koī aur bhī bachā hai?” To wuh jawāb degā, “Nahīn, ek bhī nahīn.” Tab rishtedār kahegā, “Chup! Rab ke

nām kā zikr mat karnā, aisā na ho ki wuh tujhe bhī maut ke ghāṭ utāre.” *

¹¹ Kyoṅki Rab ne hukm diyā hai ki shāndār gharoṅ ko ṭukṛe ṭukṛe aur chhoṭe gharoṅ ko rezā rezā kiyā jāe.

¹² Kyā ghoṛe chaṭṭānoṅ par sarpā daurte haiṅ? Kyā insān bail le kar un par hal chalātā hai? Lekin tum itnī hī ḡhairfitrī harkateṅ karte ho. Kyoṅki tum insāf ko zahr meṅ aur rāstī kā mīṭhā phal karwāhaṭ meṅ badal dete ho.

¹³ Tum Lo-dibār kī fatah par shādiyānā bajā bajā kar faḡhr karte ho, “Ham ne apnī hī tāqat se qarnaim par qabzā kar liyā!”

¹⁴ Chunānche Rab jo lashkaroṅ kā Ḳhudā hai farmātā hai, “Ai Isrāīlī qaum, main tere ḡhilāf ek qaum ko tahrīk dūngā jo tujhe shimāl ke shahr Labo-hamāt se le kar junūb kī wādī Arābā tak aziyat pahuṅchāegī.”

7

Ṭiḍḍiyon kī Royā

¹ Rab Qādir-e-mutlaq ne mujhe royā dikhāi. Main ne dekhā ki Allāh ṭiḍḍiyon ke ḡhol paidā kar rahā hai. Us waqt pahlī ghās kī kaṭāi ho chukī thī, wuh ghās jo bādshāh ke lie muqarrar thī. Ab ghās dubārā ugne lagī thī.

² Tab ṭiḍḍiyān mulk kī pūrī hariyālī par ṭuṭ parīṅ aur sab kuchh khā gaīṅ. Main chillā uṭhā, “Ai Rab Qādir-e-mutlaq, mehrbānī karke muāf

* **6:10** ‘Aisā na ho ki wuh . . . ghāṭ utāre’ izāfā hai tāki matlab sāf ho.

kar, warnā Yāqūb kis tarah qāym rahegā? Wuh pahle se itnī chhoṭī qaum hai.”

³ Tab Rab pachhtāyā aur farmāyā, “Jo kuchh tū ne dekhā wuh pesh nahīn āegā.”

Āg kī Royā

⁴ Phir Rab Qādir-e-mutlaq ne mujhe ek aur royā dikhāi. Maiñ ne dekhā ki Rab Qādir-e-mutlaq āg kī bārish bulā rahā hai tāki mulk par barse. Āg ne samundar kī gahrāiyōñ ko k̄hushk kar diyā, phir mulk meñ phailne lagī.

⁵ Tab maiñ chillā uṭhā, “Ai Rab Qādir-e-mutlaq, mehrbānī karke is se bāz ā, warnā Yāqūb kis tarah qāym rahegā? Wuh pahle se itnī chhoṭī qaum hai.”

⁶ Tab Rab dubārā pachhtāyā aur farmāyā, “Yih bhī pesh nahīn āegā.”

Sāhūl kī Royā

⁷ Is ke bād Rab ne mujhe ek tīsri royā dikhāi. Maiñ ne dekhā ki Qādir-e-mutlaq ek aisī dīwār par kharā hai jo sāhūl se nāp nāp kar tāmīr kī gaī hai. Us ke hāth meñ sāhūl thā.

⁸ Rab ne mujh se pūchhā, “Ai Āmūs, tujhe kyā nazar ātā hai?” Maiñ ne jawāb diyā, “Sāhūl.” Tab Rab ne farmāyā, “Maiñ apnī qaum Isrāīl ke darmiyān sāhūl lagāne wālā hūñ. Āindā maiñ un ke gunāhoñ ko nazarandāz nahīn karūnga balki nāp nāp kar un ko sazā dūngā.

⁹ Un bulandiyōñ kī qurbāngāheñ tabāh ho jāeṅgī jahāñ Is'hāq kī aulād apnī qurbāniyāñ pesh kartī hai. Isrāīl ke maqdis k̄hāk meñ milāe

jāeṅge, aur main apnī talwār ko pakar kar Yarubiyām ke ḳhāndān par ṭuṭ parūṅgā.”

Āmūs ko Isrāīl se Nikalne kā Hukm Diyā Jātā Hai

¹⁰ Yih sun kar Baitel ke imām Amasiyāh ne Isrāīl ke bādshāh Yarubiyām ko ittalā dī, “Āmūs Isrāīl ke darmiyān hī āp ke ḳhilāf sāzishēn kar rahā hai! Mulk us ke paighām bardāsht nahīn kar saktā,

¹¹ kyoṅki wuh kahtā hai, ‘Yarubiyām talwār kī zad meṅ ā kar mar jāegā, aur Isrāīlī qaum yaqīnan qaidī ban kar jilāwatan ho jāegī.’ ”

¹² Amasiyāh ne Āmūs se kahā, “Ai royā deḳhne wāle, yahān se nikal jā! Mulk-e-Yahūdāh meṅ bhāg kar wahīn rozī kamā, wahīn nabuwwat kar.

¹³ Āindā Baitel meṅ nabuwwat mat karnā, kyoṅki yih bādshāh kā maqdis aur bādshāhī kī markazī ibādatgāh hai.”

¹⁴ Āmūs ne jawāb diyā, “Peshā ke lihāz se na main nabī hūn, na kisī nabī kā shāgird balki gallābān aur anjīr-tūt kā bāghbān.

¹⁵ To bhī Rab ne mujhe bheṛ-bakriyon kī gallābānī karne se haṭā kar hukm diyā ki merī qaum Isrāīl ke pās jā aur nabuwwat karke use merā kalām pesh kar.

¹⁶ Ab Rab kā kalām sun! Tū kahtā hai, ‘Isrāīl ke ḳhilāf nabuwwat mat karnā, Is’hāq kī qaum ke ḳhilāf bāt mat karnā.’

¹⁷ Jawāb meṅ Rab farmātā hai, ‘Terī bīwī shahr meṅ kasbī banegī, tere beṭe-beṭiyān sab talwār se qatl ho jāeṅge, terī zamīn nāp kar dūsron meṅ taqsīm kī jāegī, aur tū ḳhud ek nāpāk mulk

meñ wafāt pāegā. Yaqīnan Isrāīlī qaum qaidī ban kar jilāwatan ho jāegī.’ ”

8

Pake Phal se Bharī Ṭokrī

¹ Ek bār phir Rab Qādir-e-mutlaq ne mujhe royā dikhāī. Maiñ ne pake hue phal se bharī huī ṭokrī dekhī.

² Rab ne pūchhā, “Ai Āmūs, tujhe kyā nazar ātā hai?” Maiñ ne jawāb diyā, “Pake hue phal se bharī huī ṭokrī.” Tab Rab ne mujh se farmāyā, “Merī qaum kā anjām pak gayā hai. Ab se maiñ unheñ sazā die baḡhair nahīñ chhoṛūngā.

³ Rab Qādir-e-mutlaq farmātā hai ki us din mahal meñ gīt sunāī nahīñ deñge balki āh-o-zārī. Chāroñ taraf nāsheñ nazar āēngī, kyoñki dushman unheñ har jagah phaiñkegā. Kḡhāmosh!”

Awām kā Istehsāl

⁴ Ai ḡharīboñ ko kuchalne wālo, ai zarūratmandoñ ko tabāh karne wālo, suno!

⁵⁻⁶ Tum kahte ho, “Nae Chāñd kī Īd kab guzar jāegī, Sabat kā din kab kḡhatm hai tāki ham anāj ke godām khol kar ḡhallā bech sakeñ? Tab ham paimāish ke bartan chhoṭe aur tarāzū ke bāṭ halke banāēnge, sāth sāth saude kā bhāw baḡhāēnge. Ham faroḡht karte waqt anāj ke sāth us kā bhūsā bhī milāēnge.” Apne nājāyz tarīqoñ se tum thoṛe paison meñ balki ek joṛī jūtoñ ke ewaz ḡharīboñ ko kḡharīdte ho.

7 Rab ne Yāqūb ke faḡhr kī qasam khā kar wādā kiyā hai, “Jo kuchh un se sarzad huā hai use main kabhī nahīn bhūlūngā.

8 Unhīn kī wajah se zamīn laraz uṭhegī aur us ke tamām bāshinde mātam karenge. Jis tarah Misr meñ Dariyā-e-Nīl barsāt ke mausam meñ sailābī sūrat iḡhtiyār kar letā hai usī tarah pūrī zamīn uṭhegī. Wuh Nīl kī tarah josh meñ āegī, phir dubārā utar jāegī.”

9 Rab Qādir-e-mutlaq farmātā hai, “Us din main hone dūngā ki sūraj dopahar ke waqt ḡhurūb ho jāe. Din urūj par hī hogā to zamīn par andherā chhā jāegā.

10 Main tumhāre tahwāroñ ko mātam meñ aur tumhāre gītoñ ko āh-o-bukā meñ badal dūngā. Main sab ko ṭaṭ ke mātami libās pahnā kar har ek kā sar mundwāūngā. Log yoñ mātam karenge jaisā un kā wāhid beṭā kūch kar gayā ho. Anjām kā wuh din kitnā talkh hogā.”

Allāh Āindā Jawāb Nahīn Degā

11 Qādir-e-mutlaq farmātā hai, “Aise din āne wāle haiñ jab main mulk meñ kāl bhejūngā. Lekin log na roṭī aur na pānī se balki Allāh kā kalām sunane se mahrūm raheñge.

12 Log laṛkharāte hue ek samundar se dūsre tak aur shimāl se mashriq tak phireñge tāki Rab kā kalām mil jāe, lekin besūd.

13 Us din ḡhūbsūrat kuñwāriyāñ aur jawān mard pyās ke māre behosh ho jāeñge.

14 Jo is waqt Sāmariya ke makrūh but kī qasam khāte aur kahte haiñ, ‘Ai Dān, tere dewatā kī hayāt kī qasam’ yā ‘Ai Bair-sabā, tere dewatā

kī qasam!’ Wuh us waqt gir jāēnge aur dubārā kabhī nahīn uṭheṅge.”

9

Ākhirī Royā: Isrāīl kī Tabāhī

¹ Maiñ ne Rab ko qurbāngāh ke pās khaṛā dekhā. Us ne farmāyā, “Maqdis ke satūnoñ ke bālāī hissoñ ko itne zor se mār ki dahlīzeñ laraz uṭheñ aur un ke ṭukre hāzirīn ke saroñ par gir jāēñ. Un meñ se jitne zindā raheñ unheñ maiñ talwār se mār ḍālūngā. Ek bhī bhāg jāne meñ kāmyāb nahīn hogā, ek bhī nahīn bachegā.

² Khāh wuh zamīn meñ khod khod kar Pātāl tak kyoñ na pahuñcheñ to bhī merā hāth unheñ pakaṛ kar wahān se wāpas lāegā. Aur khāh wuh āsmān tak kyoñ na chaṛh jāēñ to bhī maiñ unheñ wahān se utārūngā.

³ Khāh wuh Karmil kī choṭī par kyoñ na chhup jāēñ to bhī maiñ un kā khoj lagā kar unheñ chhīn lūngā. Go wuh samundar kī tah tak utar kar mujh se poshīdā hone kī koshish kyoñ na kareñ to bhī befāydā hogā, kyoñki maiñ samundarī sānp ko unheñ ḍasne kā hukm dūngā.

⁴ Agar un ke dushman unheñ bhagā kar jilāwatan kareñ to maiñ talwār ko unheñ qatl karne kā hukm dūngā. Maiñ dhyān se un ko taktā rahūngā, lekin barkat dene ke lie nahīn balki nuqsān pahuñchāne ke lie.”

⁵ Qādir-e-mutlaq Rabbul-afwāj hai. Jab wuh zamīn ko chhū detā hai to wuh laraz uṭhtī aur us ke tamām bāshinde mātām karne lagte haiñ. Tab jis tarah Misr meñ Dariyā-e-Nīl barsāt ke mausam meñ sailāb kī sūrat ikhtiyār kar letā hai

usī tarah pūrī zamīn uṭhtī, phir dubārā utar jāti hai.

⁶ Wuh āsmān par apnā bālākhānā tāmīr kartā aur zamīn par apne tahkhāne kī buniyād ḍāltā hai. Wuh samundar kā pānī bulā kar rū-e-zamīn par unḍel detā hai. Usī kā nām Rab hai!

Tum Dūsroñ se Behtar Nahīñ

⁷ Rab farmātā hai, “Ai Isrāīliyo, yih mat sama-jhnā ki mere nazdik tum Ethiopiya ke bāshindoñ se behtar ho. Beshak main Isrāīl ko Misr se nikāl lāyā, lekin bilkul isī tarah main Filistiyon ko Krete * se aur Arāmiyon ko Qīr se nikāl lāyā.

⁸ Main, Rab Qādir-e-mutlaq dhyān se Isrāīl kī gunāhālūdā bādshāhī par ghaur kar rahā hūñ. Yaqīnan main use rū-e-zamīn par se miṭā ḍālūngā.”

Tāham Rab farmātā hai, “Main Yāqūb ke gharāne ko sarāsar tabāh nahīñ karūnga.

⁹ Mere hukm par Isrāīlī qaum ko tamām aqwām ke darmiyān hī yon hilāyā jāegā jis tarah anāj ko chhalnī meñ hilā hilā kar pāk-sāf kiyā jātā hai. Ākhir meñ ek bhī patthar anāj meñ bāqī nahīñ rahegā.

¹⁰ Merī qaum ke tamām gunāhgār talwār kī zad meñ ā kar mar jāeñge, go wuh is waqt kahte haiñ ki na ham par āfat āegī, na ham us kī zad meñ āeñge.

Isrāīl ke lie Naī Ummīd

¹¹ Us din main Dāūd ke gire hue ghar ko nae sire se kharā karūnga. Main us ke rakhnon ko band aur us ke khandarāt ko bahāl karūnga.

* **9:7** Krete: Ibrānī Kaftūr.

Main sab kuchh yoñ tāmīr karūnga jis tarah qadīm zamāne meñ thā.

¹² Tab Isrāīlī Adom ke bache-khuche hisse aur un tamām qaumoñ par qabzā kareñge jin par mere nām kā ṭhappā lagā hai.” Yih Rab kā farmān hai, aur wuh yih karegā bhī.

¹³ Rab farmātā hai, “Aise din āne wāle haiñ jab fasleñ bahut hī zyādā hoñgī. Fasal kī kaṭāī ke lie itnā waqt darkār hogā ki āḡhirkār hal chalāne wālā kaṭāī karne wāloñ ke pīchhe pīchhe khet ko aglī fasal ke lie taiyār kartā jāegā. Angūr kī fasal bhī aisī hī hogī. Angūr kī kasrat ke bāis un se ras nikālne ke lie itnā waqt lagegā ki āḡhirkār bīj bone wālā sāth sāth bīj bone kā kām shurū karegā. Kasrat ke bāis naī mai pahāroñ se ṭapkegī aur tamām pahāriyoñ se bahegī.

¹⁴ Us waqt main apnī qaum Isrāīl ko bahāl karūnga. Tab wuh tabāhshudā shahroñ ko nae sire se tāmīr karke un meñ ābād ho jāeñge. Wuh angūr ke bāgh lagā kar un kī mai pieñge, dīgar phaloñ ke bāgh lagā kar un kā phal khāeñge.

¹⁵ Main unheñ panīrī kī tarah un ke apne mulk meñ lagā dūngā. Tab wuh āindā us mulk se kabhī jaṛ se nahīñ ukhāre jāeñge jo main ne unheñ atā kiyā hai.” Yih Rab tere Ḳhudā kā farmān hai.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

PDF generated using Haiola and XeLaTeX on 15 May 2025 from source files dated 15 May 2025

123ff8cb-27b3-5817-a02a-22e67145fd30